



**Kalaallit Nunaanni silaannaap allanngoriartornera pillugu periusissiamik pisariaqartitsineq pillugu apeqquteqaat aallaavigalugu oqallisissatut siunnersuut. Silaannaap allanngoriartornera pillugu periusissiap taamaattup, silaannaap allanngoriartorneranut tungassuteqartumik apeqqutitut siusinnerusukkut periusissiaasimasunut katersuuffiussaaq.**

(Inuit Ataqtigiit, Inatsisartunut ilaasortaataat)

Silaannaap allanngoriartornera pillugu periusissiamik pisariaqartitsineq pillugu apeqquteqaat aallaavigalugu siunnersuummut Inuit Ataqtigiit qujanaq.

Demokraatit Inatsisartuni ilaasortaatarisimasaata Steen Lyngip FM2019, avataaneersunik immikkut ilisimasalinnik pilersitsisoqarnissaanik siunnersuut akueritippaa, taakku innersuussutit, uagut politikikkut mingutsitsinnginnerusumik silaannaallu pissusaanut sunniutaangitsumik iliuuseqarfigisinnaasagut. Siunnersuteqartumut pingaartuusimavoq, innersuussutit ataasiakkaarlutik inuiaqatigiinnut innuttaasunut/suliffeqarfinnut immikkut aningaasatigut kingunissai naatsorsuusioneqarsimassasut.

Demokraatit isumaqarput, pingaartuusooq, siunissami silaannaap allanngoriartornera pillugu periusissiasaq, immikkut ilisimasallit innersuussutaannit aallaaveqarpat. Tassunga atatillugu Naalakkersuisut apererusuppagut, immikkut ilisimasallit suliaat sumut killinnersoq, aammalu qaqugu innersuussutitik Inatsisartunut innuttaasunullu saqqummiunniarneraat ilimagineqarnersoq?

Silaannaap allanngornera inunnik pilersinneqartoq maanngangaaq malunnarsereerpoq, ukiullu tamaasa ersarissiarlorluni. Iluqaataangilaq, qiviimiataaginnarutta isumaqarlutalu, nammineq qaangiutissasooq. Allatut ajornartumik unamminartut ilumooruttariaqarpagut, iliuuseqartariaqarpugullu. Taamaaliortariaqarpugut uagut aaliangiisartut, suliffeqarfii ataasiakkaat aammalu innuttaasut tamarmik. Demokraatit uppeeraat, ineriartornerup mumisissinnaanera. Pisariaqarporli, ataatsimoorussamik iliuuseqarnissamut piareersimanissarput.

Ilisimavarput, silaannaap allanngoriartorneranut apeqqut inuusuttunit pingaartinneqartoq. Marts 2019 meeqqat inuusuttullu nunatsinni ingerlaaqatigiippat inersimasuusugut paasitinniarluta, tamanna ilungersunartuusooq. Taakkualu qutsavigerusuppakka. Meeqqat inuusuttullu nipaata pingaartupilorujussuuvoq, annertuumillu tikkuussilluni, uagut politikkeritut iliuuseqarnissatsinnut pissusaaffeqartugut. Eqqaamassavarput, taakkuummata, ullumikkut meeqqat inuusuttullu, inuiaqatigiinni aqutsinermik ingerlatsinermillu nangitsisussat. Taamaattumik tusarnaarlugillu iliuuseqarfigisariaqarpagut.

Demokraatinullu pingaartuusooq aaliangersumik oqaatigissallugu, ullumikkut silaannaap allanngoriartornera akiorniarlugu annertuumik iliuuseqareeratta. Taamaaliorsimanitsinnut assersuutissatsialaavoq, kallerup inneranik- aamma kiassarnermut pilersorneqarnerput nukissiuutinit ataavartunit pimmat. Tassani nunatut maligassiuisuuvugut, tamannalu tulluusimaarutigissavarput.

Taamaattumiguna pingaartuusooq, siuliani eqqaasatta immikkut ilisimasallit suliaasa sumut killinnerannik paasisaqarnissarput. COVID-19 suliat kinguaattoortissimasinnaavaat, tamannalu paasilluarsinnaavarput.



Taamaakkaluartorli isumarput allanngunngilaq, tassami immikkut ilisimasallit suliaat pingaartorujussuusoq pitsaasumik eqqarsaatigilluakkamillu silaannaap allanngoriartorneranut periusissamik suliaqartariaqarnermut. Nassuerutigisariaqarparpummi, aningaasassaqartinnginnatsigu, silaannaap allanngoriartorneranut periuseriумаакkat tamaasa suliarissallugit. Suliniutigut pingaarnersiortariaqarpagut, inuiaqatigiittut innuttatta inuunerissuunissaannut pingaartitagut akissaqartissagutsigit.

Tamanna tunngavigalugu Demokraatit isumaqarput, silaannaap allanngoriartorneranut periusissamik pisariaqartitsilluinnartugut, iliusissarli pitsaasuusaaq, suliarilluagaq eqqarsarluarlunilu suliaq. Taamaattumik immikkut ilisimasallit suliaat utaqqisariaqarparput, silaannaap allanngoriartorneranut periusissavimmik suliasamik aallartitsinnginnitsinni.

Tassalu Demokraatit uunga oqallinnermut isummersuutigigallagaat.